

...?Prouvènço!...

Lou bèl an 103 de la Soucieta



Nouvello tiero: n° 65 Tresen trimèstre de l'an 2008

Usage e coustumo dóu Terraire Marsihés

Assouciacioun ...?Prouvènço!... founded en 1905

**18 Carrierro de Beyrouth - 13009 Marsiho
C.C.P. : 1073.94 X - Marsiho**

Buletin trimestriau : Juliet - Avoust - Setèmbre de 2008

Abounammen : 25 éurò pèr li cous de prouvençau e lou buletin

Abounamen : 10 éurò pèr li sòci e lou buletin

Ensignadou

-:-

Cuberto

...?Prouvènço!...

- Lou mot de la cabiscole	Tricò Dupuy
- Lincouneigu de la Maraïso	Jade Garnier
- Lou maou de dents	Marius Bourrelly
- Espressoïoun nostro	Louis d'Andecy
- E mi pantai d'enfançò	Mariso Fourcaud
- Es pas de crèire!	Brunoun Gimet
- Lou trin de Mazargo	Toussant Payan
- Marsiho e si mounumen	Glaude Chave
- Moun païs	Brunoun Gimet
- Lou cros di gigant	Roso Pous
- Istòri de peceto	Jaque Tricon
- La pichoto culoto	Tricò Dupuy
- Lou passage à-n-Aigo-morto de Jòrgi Simenon	Louis d'Andecy
- Istòri de moun ami ou cabussaire	Glaude Chave
- A prepaus de l'Infèr	Tricò Dupuy
- Umour de medecin	Louis d'Andecy

Messo en pajo, beilesso de la publicacioun : Tricò Dupuy

-:-:-:-:-:-:-:-:-:-:-:-:-:-:-:-:-:-

Lou mot de la cabiscolo

Mes de setèmbre, la fin di vacanço, la rintrado, l'escolo, li journado courto... Cadun repren lou camin de soun travai, siegue emé lou mourre, siegue emé lou sourrire.

Li lengo regiounalo fuguèron marcado dins la Coustitucioun: demandavian la moudificacioun de l'article 2, an moudifica lou proumié...

Uno grando manifestacioun pèr li lengo regiounalo es encaro previsto pèr 2009. Nautre, reprenèn neste pres-fa, en pensant que 2009 sara l'annado Mirèio, valènt-à-dire que festejaren lou cènt cinquantenari de l'espelido dóu pouèmo de Mistral, Mirèio, que countribuïguè largamen à soun pres Nobel.

L'an passa de nouvèu sòci soun vengu nous rejougne bono-di la publicita qu'avès agu lou gentun de faire.

Gramacie tóuti aquéli que m'an pas óublida dóu tèms di vacanço en me mandant de carto poustalo, de telefounado, d'email, de tête pèr lou buletin. Sèmblo que la Soucieta se reviho un pau.

Es vous que la fasès viéure!

Adounc, vous espère tóuti gaiard pèr coumença uno nouvello annado, autant fidèle e afouga pèr nosto lengo que l'an passa.


Oscò, e longo mai!

Couralamen

Vosto sèmpre devoto
Tricio.

L'Incouneigu de la Maraïso

Bernat Giély



Dins un vilajoun perdu d'uno valèio dis àutis Aup, sus li flanc de la mountagno Maraïso, à l'asard d'uno caminado, un vanegaire soulitari descuerb lou trau d'uno croto escoundudo pèr de roumi entre-nousa.

L'escaleto d'un ome jais au founs d'aquel avenc. Un pistoulet d'ourdounanço sèmblò avé resquiha de sa man descarnado.

La croto a degu servi d'escoundudo. Tóuti lis ustensiho d'un abitat se vèson, aqui, souto la pousso dóu tèms, mai sobre-tout se drèisso un amoulounamen de bouito de ferre, clafido de fueio de caièr cuberto d'uno escrituro sarrado.

L'incouneigu raconto, ligno à cha ligno, sa vido à l'escoundudo en fàci dóu village qu'assousto sa bèn amado.

Perqué se vòu pas moustra... tutto l'intrigo dóu libre es aqui... e quau es aquel incouneigu...

Li message d'un amour desmesura se mesclon au recit. Lou desespèr es jamai de miso. L'espèr se retrobo dins uno autre entrigo, mai atualo que pamens rameno lou legèire à la descuberto d'uno erouïno d'un autre age. Un persounage autant mai en desmesuro pèr lou long caminamen de sa fidelita.

L'intrigo reboumbis de-longo.

Lou liame que ligo li dous amant se nouso
à la fin dóu rouman dins uno estranjo
verita.

De-segur, lou libre coumenço e sabèn pas
ounte anan :

— *Avié adeja pas plus d'age, n'i'en
couneiguère jamai. Èro uno eternalo
grand, touto en tristesso, dins lou negre
passi di raubo de long véusage. L'aurian
pouscudo retrouba en image, masiero
endimenchado vo damo oubriero, bèn sajo
sus aquéli carto poustalo di fotò faleto en
de decor vapourous vièi de l'avans-
guerro...*

Mai quento guerro ?

*Devinave mau la durado di vièii gènt en
aquéu siècle finissènt.*

*Éufràsio, me sarié esta baia de l'aproucha,
se moun inchaiènto jouinesso vagaboundo
me n'avié leissa tèms.*

*Aguère adounc pas l'ur d'ausi sa voues,
que disien douço e pàsi. Restara pèr iéu
uno oumbro lòugier e mudo sus un camin
sènsa fin d'uno vido que s'enfugis, aro, dins
l'óublit.*

*Uno sucessioun d'asard me la faguè
pamens retrouba à la flour dóu brancage
enmescla d'un aubre genealougi que se
ramificavo, à bèl èime, au grat di lignado.*

*Lou lignage di vieìis amo dóu village
s'entre-nousavo dins li parentage. De
cousin remuda de german en cousin
d'alianço, un cousinage dènse cledavo lis
oustau famihau, rampouna sus si racino,
parier à-n-aquéli planto lignouso que
bravejon li siècle pèr apara quâuqui
pastouiro de muraio aboulido.*

L'enmesclamen es enmascamen. Coume à
l'acustumado, l'autour nous aganto. Soun
raconte nous apetego e nous ten en alen
enjusco la fin. Poudèn pas pensa que sian
dins l'envencioun, es quaucaren qu'a degu
eisista. Nous meno trouba un secrèt,
vanego dins tutto meno d'asard à l'afflat de
sa sensibilita. Coume disié Racine a fa

quaucarèn de pas rèn. Mai trobo çò que dèu
dire pèr persuada de sa verita.

Rouman istouri, un pau, bèn segur, sian dins un
tèms passa pèr pas dire dins dos epoco
qu'enmesclon e renouson lis amour.

Rouman sicolougue, un pau, sian dins la
counfessioun d'ùni persounage.

Rouman d'entrico, aqui de-bon, Bernat Giély,
es lou grand mèstre, si trobo soun pas
estereoutipado.

La seguido dis acioun s'encadeno couladisso
dins sa lougico. Emai tout fuguèsse estrange,
l'intrigo passo pèr uno vesoun couérènto dóu
mounde pèr l'autour dins si camin de la liberta.
Bernat Giély es tourna-mai un virtuso dóu recit.
Lou dramati dins li mours d'uno epoco
revouludo coumpatible em' un amour sublime
vèn pourta uno autre passioun amourouso dins
noste tèms.

Bèn-segur, aqui coume dins sis àutri rouman,
l'estile de Bernat Giély es naturau, intuitiu. Lis
elemen de si sequènci verbalo qu'a pesca dins
lou reau baion un realisme assoulu. Jogo
toujour de bon sèn emé la richesso de nostro
lengo.

J. Garnier

- - -

Vaqui un vièi pichot quatrin dóu felibre Marius
Bourrelly releva dins l'armana-guide de
Marsiho e di Bouco de Rose d'Alfred Saurel pèr
l'annado 1870 :

Lou maou de dents

Receto

Quant avès mau de dènt, dins la bouco fau
mettre

Uno poumo, e bouta la tèsto dins un four ;
La poumo si couira, e pouèdi vous proumettre
Qu'uno fès cuecho, avès pus ni mau ni doulour.

Coumentàri: poutingo noun ramboursado pèr la
Sécurité Sociale.

Espressoion nostro

- as passa la rego** = tu as exagéré (tu as dépassé le trait)
- dourmi di quatre** = dormir profondément (dormir des quatre, allusion au sommeil des vers à soie qui précède leurs 4 mues)
- faire uno mino de quatre pan de long** = faire la moue (faire une mine de 4 pans de long)
- planto-ié un cade** = il faut que tu t'y résignes (plantes-y un genévrier)
- mounta sus sa figuiero** = monter sur ses grands chevaux (monter sur son figuier)
- es de parpello d'agasso** = ce sont des vétilles (ce sont des paupières de pie)
- susa l'encre dóu fege** = s'épuiser, suer sang et eau (suer l'encre du foie)
- dire soun pan d'un sòu** = déclarer sa flamme (dire son pain d'un sou)
- faire d'iol de cassounado** = faire les yeux doux (faire des yeux de sucre non raffiné)
- sauta de la cabro au perié** = faire des coq-à-l'âne (sauter de la chèvre au poirier)
- metre dins un sang bouïent** = mettre hors de soi (mettre dans un sang bouillant)
- se douna lou cop de la mort** = se suicider (se donner le coup de la mort)
- tanca un clavèu** = faire une dette (planter un clou)
- faire passa lou goust dóu pan** = mettre à mort (faire passer le goût du pain)
- crèmo au lume** = c'est une chose évidente (cela brûle à la lumière)
- nada dins l'aigo roso** = nager dans le bonheur (nager dans l'eau rose)
- jouga à tèsto o crous** = jouer à pile ou face (jouer à tête ou croix)
- estaca lou bout** nouer conversation (attacher le bout)
- faire puto fin** = mal finir (faire une « putain » de fin)
- li nèsopo s'amaduron** = les choses s'arrangent (les nèfles mûrissent)
- brula banasto** = changer de vie, se corriger (brûler corbeille)
- soun semena espés** = ils sont nombreux, il y en a beaucoup (ils sont semés épais)
- soun semena clar** = ils sont peu nombreux, il n'y en a pas beaucoup (semés clair)
- sèmblo toumba di banasto** = il semble tomber des nues (il semble tomber des corbeilles)
- es pas d'òli enjarra** = ce n'est pas facile (ce n'est pas de l'huile en jarre)
- coume l'aucèu dins la garbiero** = comme un coq en pâte (comme un oiseau dans la meule de gerbes)
- manja pèr lis image** = ne pas avoir d'appétit (manger pour les images)
- es pas pèr pinta de gàbi** = ce n'est pas pour enfiler des perles (ce n'est pas pour peindre des cages)
- buta à la rodo** = faciliter les choses, apporter son appui (pousser à la roue)
- n'ai quatre pan sus la tèsto** = j'en ai par-dessus la tête (j'en ai quatre pans sur la tête)
- faire tiba la guète** = presser le pas (tendre, étirer la guêtre)
- uno calour que fai toumba la co dis ase** = une chaleur atroce (une chaleur à faire tomber la queue des ânes)
- durbi, douvri lou tai** = faire les premiers pas (ouvrir le sillon)
- faire d'ieu d'iol de sùpi** = faire les yeux doux, des yeux langoureux (faire des yeux de sèche)
- manja de favo** = bredouiller (manger des fèves)
- saupre lou mot de Santo Claro** = connaître le fin mot (savoir le mot de Sainte Claire)
- faire cachiero en quaucun** = faire fête à quelqu'un (faire démonstration d'amitié)
- empura lou gavèu** = fomenter la division, créer la zizanie (attiser le sarmement)
- acò apouncho pas un fus** = cela est inutile (cela n'appointe pas un fuseau)

l'esquichun de rasin = le jus de raisin (le pressé de raisin)

la vièio voulié jamai mouri = il t y a toujours quelque chose à apprendre (la vieille ne voulait jamais mourir)

un pistachié = un coureur de jupons (autrefois la pistache était considérée comme aphrodisiaque)

seca la paraulo = couper la parole, interrompre (sécher la parole)

franc coume un ase que recuelo = de mauvaise foi (franc comme un âne qui recule)

a mes un pas d'estouma, un pau de ventresco = il a pris de l'embonpoint (il a mis un peu d'estomac, de ventrèche)

foundre coume burre dins la sartan = fondre comme neige au soleil (fondre comme beurre dans la poêle)

leissa toumba au demembrié = laisser tomber dans l'oubli (laisser tomber dans le fleuve de l'oubli)

lou capelan dis pas douz cop la messo = une bonne occasion ne se présente pas deux fois (le curé ne dit pas deux fois la messe)

tout ço que dis es pas la messo = ce n'est pas parole d'évangile (tout ce qu'il dit n'est pas la messe)

un gousto-soulet = un égoïste (qui goûte seul)

dou tèms que Berto fielavo = au bon vieux temps (depuis que Berthe filait)

L. P. d'A.

- - -

E mi pantai d'enfanço...

*E mi pantai d'enfanço
m'adusien en Prouvènço
La douço cansouneto
qu'avié fredounejado
subran resourgissié
sus un tros de papié.*

*Un raioun de lumiero
sus li paret peirouso
Lou soulèu penetravo
e l'oustaou s'escleiravo.
Arrivavo lou printèms
quand fugissié l'ivèr mourdènt.*

*Un ciprès se dreissavo
proche lou vièi poumié)
D'oulour de ferigoulo
s'escapavon dins l'èr
e lou cant de cigalo
fasié un brut d'infèr.*

*Lis orgue e li valèio
miravon la mar bluio
Lou mistrau s'aubouravo
moun pantai s'envoulavo
di bârri de l'Auvergno
i fléurop de Prouvènço.*

Mariso Fourcaud

Es pas de crèire !

Nous fau parla d'uno causo di mai sousprenèto. Uno causo que degun aurié pensa vèire o ausi un jour, e que pren d'à contro-pèd tout ço qu'avian entendu.

Lis ome an toujour fa coume acò e quouro disse lis ome, es pas uno deco, que li femo soun pas pertoucado pèr aquelo causo. Belèu que n'iaura pèr dire lou countràri.

Li valour tradicounalo soun aro bourroulado e entendèn ço qu'aurien jamai cresegu entendre, tenès-vous bèn, segur qu'anas èstre sousprès, retenès bèn voste alen.

L'an di à la radiò : es miés d'avé uno pichoto qu'uno grossso!

O! m'avés bèn aussi : es miés d'avé uno pichoto qu'uno grossso!

Pamens, de l'enfanço, li garçoun pènson pas qu'à acò: n'avé uno grossso, mai grossso que si coulègo!

Pèr li drole, es un biais de se plaça.

Li cadèu que coumençon d'avé lou péu fouletin espinchon si coulègo e pantaion pas qu'à-n-uno causo : avé la plus grossso.

Pièi, en prenent d'age, li garçoun coumprenon lèu que li fiho agachon acò e se n'i'a un qu'à uno grossso, se lou diran tóuti, e aquéu aura forço réussido.

Sai bèn que li femo que nous escouton diran :

- Iéu, ère pas coume acò, e acò m'interassavo pas...

Messourguiero!

Avèn tóuti vist qu'entre aquéu qu'avié uno pichoto e l'autre que n'avié uno grossso, s'enganavon pas! e, fier coume Artaban, aquéu de la grossso avié toujour uno fiho pendoulado à soun bras.

E, sèns intra dins li vestiari, acò se vesié e acò se savié.

Un cop marida, acò continuavo riboun-ribagno. Chascun darrié si ridèu, espinchavo soun vesin pèr assaja de la vèire e pèr establi de coumparesoun.

Lis espouriéu fan tout ço que podon pèr faire vèire qu'an li plus grossso. I'a même de calendié mounte venon moustra que soun bèn equipa.

Li cap d'entrepreso n'an uno grossso e li capelan, mai d'un cop, n'an pas qu'uno pichoto.

Mai, veici que l'an di à la radiò e à la televisioun : es miés d'avé uno pichoto qu'uno grossso.

E, mai qu'acò van douna uno primo pèr li pichoto e un desavantage pèr li qu'an uno grossso!

Espere qu'avés tóuti coumprés que parlave de veituro e qu'acò es uno istòri de poulucioun, d'èr poulua e mau-san, d'efèt de serro...

S'avia pensa à quicon d'autre, belèu vous faudra ana faire la bugado, es à dire vous counfessa d'un bon capelan.

E, malavalisco pèr quau n'en pensarié mau!


Brunoun Gimet



Lou trin de Mazargo

En esperant lou trin de Sant-Ginié, deman es lou trin de Mazargo, que, tamben, fa parla d'eo. Es à Mazargo, dien, que debaousseron Sant-Roc din la sueio, e coumo es lou patroun doou vilàgi, lei Mazarguen poudien pas si passa de soun sant e manderoun uno delegacièn à Roumo pèr n'en fa faire un aoutre. Es alor que lou troubaire Toussant Payan, enreguè, l'a bessai mai de quaranto an, aquesto pèço de vers que lei Mazarguen seran countènt de legi.

Sant-Roc



Un vièi, paisan, un jour mi racountavo
Qu'à soun païs, encianamen,
Soun bouen cura, piousamen,
Souventei-fes li predicavo
Dussu la santo Carita.

Sei parroussien plen de pieta,
Qu'èron pas sourd à sa demando,
Din lou trouv metien soun oufrando
Pèr n'en croumpa pu tard sant Roc
Lou preservatour de la pèsto;
Que lou jour de sa fèsto,
En lou portant l'esclapèron ta tèsto,
Pèr un terrible choc.

Lou deminge en venent, lou pastour mounto en chèro,
Sermouno soun troupeou, li dis: — Mei très cher frèro,

Sabes que d'argènt n'ai pas trouu.
Sant Roc, nous counvendrié de n'en fa faire un
noou,
Pèr paou que dounessias, aourian bèn leou la
soumo,
E coumo acò d'aqui lou farian faire à Roumo
A-n-un bouen escultour bachin,
Que nous reussirié sant Roc, emé sou chin.

Quand de la troupo devouado,
La soumo fouguè desboursado,
Choousissèron douz parroucien
Qu'anèron en deputacièn
Encò de l'escultour pèr parla de l'afaire.
L'artisto, sus rèn entreprés,
Digué: — Mi càrgui vous lou faire,
Se sian d'accord doou près.
— D'accord pourren que v'estre,
Basto sié fa pèr man de mestre.

— Degun li metra man que ieou.
Fès-mi lou plesi de mi dire
Se lou desiras mouart, vo vieou,
Vo quand subissé lou martire,
Vo mies encaro em' un èr pietadous.

Lei delegua, s'aluquèron touei dous,
Pèr qu'avant de quita Mazargo,
Degun l'avié douna la cargo
De lou coumanda vieou vo mouart.
Un, voulié s'entourna subran, lou mume souar,
L'aoutre li dis: — Que vas faire, coumpaire,
Lou fèt es pas puei tant serieou,
Counvèn de lou fa faire vieou,
Pensi que vieou deoura li plaire;
Puei, aprè tout, que poou nous arriba,
Se lou vouelon pas vieou sian à temp de lou tua.

Toussant Payan

Marsiho e si mounumen

Marsiho es uno vilo tras qu'anciano, vilo de mai de 2600 an. Mai, poudès barrula dins tóuti li carriero, i'a ges de mounumen datant di Grè vo di Rouman. Lou mai vièi, que rèsto, dato dóu siècle cinquen e es la croto de la baselico Sant Vitour.

Tóuti aquéli mounumen an despareigu, en causo que Marsiho restè embarrado dins si bàrri enjusqu'à la fin dóu siècle XVIIen, quouro lou rèi Louïs lou quatourgen decidè d'embeli la vilo e de l'agrandi en desplaçant li bàrri. Jusqu'à-n-aquelo epoco li Marsihés an degu coustruire e rebasti, fauto de plaço, sus l'emplaçamen dis ancian bastimen e souvènti-fes emé li matèri de recuperacioun.

Aro avèn ges de testimòni dóu liunchen passat, mai, nous rèsto d'à passa-tèms quàuqui mounumen que valon lou destour.

- Li fort Sant Nicoulau e Sant Jan.

Es li dous fort qu'aparon l'intrado dóu Port Vièi, mai, à la debuto èron simplamen dos pichòti tourre, la tourre Maubert à l'uba (coustat de l'auturas San Jan), qu'es devengudo lou fort Sant-Jan, e la tourre San-Nicoulau au miejour (coustat dóu quartié dóu Faro), qu'es devengudo lou fort Sant-Nicoulau.

En 1423, après l'ataco dis Aragounés, lou rèi Reinié fagué refourti li defènso dóu port en coustruisènt à la plaço de la tourre Maubert l'atualo tourre carrado San Jan (entre 1447 e 1452).

En 1644, i'apoundeguèron la tourre dóu Fanau ounte de fiò de bos servien de signau pèr li marin.

Au siècle XVIIen lou rèi Louïs lou quatourgen, après agué soumés la vilo emé soun armado, faguè basti lou fort Sant-Jan en lou destacant de l'auturas Sant-Jan, pièi en plaço de la tourre Sant-Nicoulau faguè basti lou fort San-Nicoulau. Se dèu l'architeituro d'aquéstis oubrage au celèbre manescau de Vauban.

En 1862, enfin, lou fort Sant-Nicoulau fuguè coupa en dous pèr realisa l'atuau balouard Charles Livon (1).



- Lou clouchié dis Acoulo.

Dins lou quartié dóu Panié lou clouchié dis Acoulo es tout ço que rèsto de la glèiso de l'Age mejan, pèr-de-que la glèiso fuguè arrouinado en 1794, souto la Revoulucion, pèr agué acampa de rebelle à la COUNVENCION NACIOUNALO.

- L'Hotel Dieu

Vaste bastimen de tres estànci en formo de fèrri de chivau. À la debuto, au siècle dougen, èro un pichot bastimen que se disien Espitau dóu Sant Esperit.

Sara rebasti dins sa formo atualo entre 1753 e 1782 sus li plan dóu nebout de Jùli Hardouin Mansart, descendènt dóu grand architèite Francés Mansart. Souto lou segound empèri sara remaneja e auboura en un vertadié mounumen pèr la medecino. Fuguè forço tèms un di principau espitau de la vilo de Marsiho. Vuei, vuege, dèu èstre trasfourma en oustalarié de lüssi.



- L'Oustau Coumunau.



L'Oustau Coumunau dato dóu siècle XVIIen e fuguè basti sus l'emplaçamen de la Loge que servié de bastimen coumunau e tambèn de chambro de coumèrci.

Basti entre 1653 e 1673, se dèu li plan à l'architèite Meolans e à l'engeniaire Bilondelle, l'atribucioun di plan à l'artisto Pèire Puget (1622-1694) es qu'uno legèndo. Escrincelè soulamen l'escusson de la façado. Lou bastimen de darrié e la passarello fuguèron ajusta un siècle mai tard.

Si darriéris annado uno salo d'acamp fuguè bastido soto la plaço Bargemon que coustejo l'Outau Coumunau.

- La vièo Carita.

La vièo Carita fuguè bastido au siècle XVIIen, pèr embarra, dins un liò propre, li paure, natiéu de Marsiho, sus uno decisioun dóu counsèu de vilo en 1622.

La proumiero pèiro d'aquel ouspice fuguè pausado lou 24 de jun de l'an 1640. Dóu tèms de la coustrucioun, un benfatour pourgiguè un mouloun de dardèno pèr ié coustruire uno glèiso, e es lou proujèt de Pèire Puget que fuguè adóuta. Malurousamen la capello sara acabado qu'en 1707 après lou trespassamen de l'ilustre artisto.



Forço desgrada, dins li siècle passa, lou mounumen es esta restaura dins lis annado vueltanto pèr deveni un liò d'espousiciooun.

- Lou Palais dóu Pharo



Lou baus dóu Pharo situa à l'intrado dóu port, se disié autre-tèms lou baus de la tèsto de Mouro. Quouro lou prince-presidènt Louïs-Napoleoun (1808-1873) venguè à Marsiho en 1852, manifestè l'envejo d'agué uno residènci sus aqueste baus. La vilo de Marsiho croumpè lou baus, e lou palais fuguè basti en dos annado en 1858. Aquest, fuguè jamai abita pèr lou prince-presidènt que devenguè Emperaire, à la mort de Napoléon III la vilo vouguè recupera lou palais, l'emperairis Eugenio gagnè lou proucès emé la vilo mai pourgiguè generousamen lou palais à la vilo.

- Lou Palais de la Bourso.

Autre-tèms li negouciant de Marsiho s'acampavon dins lou plan-pèd de la Loge, mai coume fuguè indispensable de refourti lou bastimen en 1841, aquesti deguèron trouba un autre liò d'acamp. Vint an plus tard fuguèron definitivamen relouja dins lou palais de la Bourso, inagura en 1860 pèr Napoleoun III.

Fau saupre que la Chambro de coumèrci de Marsiho es la mai anciano de Franço. Fuguè creado pèr letro patènto pèr lou rèi Enri lou quatren lou 15 d'abriéu 1600.

- La Prefeituro.

Es lou prefèt Maupas qu'au siècle XVIIen faguè coustruire lou palais de la Prefeturo sus de plan ispira dóu celebre *Palazzo Vecchio* de Flourènço. Basti de 1861 à 1866 es ourna d'estatuo d'ome celebre de l'istòri de Marsiho e de Prouvènço.

- Lou Palais Longchamp.

Souto lou segound empèri, pèr adurre l'aigo de la Durènço enjusqu'à Marsiho, l'engeniaire Mayor de Montricher coustruïguè en 1838 lou canau de Prouvènço. Decidè de basti un castèu d'aigo pèr reçaupre l'aigo au bout d'uno derivacioun dóu canau principau. Mai fuguè qu'en 1862 que la coustrucioune coumencè souto la formo dóu palais Longchamp, que li plan soun degu à l'architèite Esperandieu (1829-1874). L'inaguracioun se faguè lou 14 d'avoust 1869.

L'estatuo que decoro lou trapan amount dóu mounumentau escalié represènto Durènço. Aquelo es degudo à l'artisto Jùli Cavalier. Se remarco tambèn, dos grandaràssis estatuo de biòu, que se dèu à l'artisto Barye. Lou pintre Puvis de Chavannes (1824-1898) realisè la decouracioun dins lou palais.



- La Nouvelo Majour.

La catedralo de la nouvelo Majour fuguè bastido sus l'emplaçamen de l'anciano Majour de 1852 à 1893. L'architèite Leoun Vaudoyer (1803-1872) diregiguè li travai enjusqu'à sa mort, piëi, es Esperandieu que finiguè li travai. Aquesto catedralo, qu'es la mai grando di glèiso bastido au siècle XIXen, mesclo l'estile gouti pèr lou plan, rouman pèr l'elevacioun e bizantin pèr li coupolo.

- Nosto Damo de la Gardo.

Autre-tèms i'avié uno vigò sus la colo de la Gardo, en 1214 un ermite ié bastiguè uno capello e un oustau. Lou rèi Francés proumié en 1524 faguè basti un fort à l'entour de la capello. Mai qu'un cop aquesto capello fuguè agrandido e en 1853 faguè decida de coustruire uno baselico mai ufanouso sus li plan, d'encaro, Esperandieu. Fau saupre que li pèiro vènon de Calissano e que l'estatuo de la Vierge fai quasimen dès mètre de naut.



- Lou Castèu d'If.

Es lou rèi Francés proumié que faguè basti uno fourtificacioun sus l'isclo d'If pèr apara la vilo d'ataco pèr la mar, acabado en 1528, elo, fuguè uno mediocre fourtificacioun au poun de visto militàri, mai uno eicelènto presoun d'estat.

Lou castèu d'If es devengu celèbre bon-di moussu lou comte de Mirabeau (1749-1791) qu'ié fuguè embarra e sobre-tout bono-di lou rouman d'Aleissandre Dumas, Lou comte de Monte-Cristo, escrich en 1846. Vuei, de milié de touristo vènon vèire li celulo de l'abat Faria e d'Eimound Dantès.

Vaqui uno pichoto tiero de mounumen que fau vèire quouro se passo pèr Marsiho. Mai, Marsiho escound encaro d'àutri tresor que meriton d'estre vist.

- (1) Carle Livon (1850 – 1917) dóutour en Medecino, participè à la preparacioun dóu vacin contro la ràbi emé Louis Pasteur. À Marsiho, foundè lou proumié cèntre contro la ràbi de Franço après lou de Paris.

Glaude Chave

Moun païs

Moun païs es eici, i'a mai d'or que de gris
Es un païs de soulèu, e me manco pas d'èr.
Dóu blu qu'esclato-viéu e de l'or de fuiun
Quouro pèr vendèmi, festajan l'autoun
Qu'amoulouno richesso, de sau e de rasin.
Quouro la terro se pauso, tant qu'a douna
E que lis ome se divertisson, à la fèsto o la fiero.

Moun païs es eici, i'a mai d'or que de blanc.
Lou blanc soun li jalado, pas forço nèu
Mai pulèu li blancado e, à jour fali
Fiò d'ourizount nacra coume escrin à la luno.
Quouro li terro dourmihouso dins lou cor de l'ivèr
Fan proumesso à la vido d'un revihun d'esclare.

Moun païs es eici, arc-de-sedo e plueio d'or
Quouro à bèus iue vesènt, li floureto ournon
Lou couifage di chato, milo e uno coulour
Di prado, que li calignaire pihon.
Cor de la terro en fèsto, vèn! redevène printèms
E me farai pouèto pèr canta l'amour de mi vint an.

Moun païs es eici e, se i'a d'or e de blu
Dins lis arenos, i'a de negre e de blanc.
En ribo de mar, i'a d'enfant, e li cors s'abéuron de soulèu.
E la terro s'aventuro en cant d'eternita
Quouro l'estiéu, neste cor boufo si darrié vènt
Nòsti grand souar, plan-planet, s'estelon en fiermamen.

Moun païs es eici, dins li raro de la pichoto Camargo,
Es un païs de gau e de peno
Mai lou jour e la niue soun clafi d'or
Es un païs de bonur e, d'à cha pau, m'atupisse em' éu.

Brunoun Gimet

Lou cros di gigant

De segur, fai long tèms d'acò encaro mai long tèms que perpèto, dins lou rode grandas mounte aro se podon vèire d'un caire la Duranço emai de l'autre lou Verdoun, restavon li drole dóu Caïn.

Eron de gigant porto-esfrais tant pèr sis estaturo e tambèn sis abouminàblis entre-signé que dounavon d'èr, pèr de bon, à soun paire, aquéu marridun qu'avié estramassa soun fraire.

A l'encauso de sa taio desmesurado èron clafi de bragadisso e acò li fasié veni boudenflo d'ourguei. Tèsto aqui, se pensavon qu'èron tant pouderous, que sa plaço èro pas subre la terro mai dins lou cèu, mounte poudrien faire regnanço subre-tout l'univers. Tout li fasien mestié pèr arriba à mestreja aqueste poudé, tambèn, se pensavon meme de desbaussa li mountagno.

- Zóu, fau derraba à la despacho la Mountagno de Luro e tambèn lou Coussoun. Fau li sagata si racino e tanca tout lou bataclan, à l'auturo di Tres Evescat, faguè l'einat.

-Acò vai, faguè lou segound. E quouro auren fa un moulounas de clapatas, faudra escala fin qu'à daut. Pièi, faren la courbo-seto pèr ajougne li pounchoun dóu trelus.

Lou tresen diguè:

- D'aqui, pas degun poudra faire resistènci, e d'aqueu biais saren sènsoun coundèsto, li mestre de l'univers entié.

Se rounseron à soun pres-fa, emé de cridaduro tant pouderous que lou cèu se meteguè à tremoula.

Si gèst èron tant large qu'esparpaivon de moulounado d'èr. Li niéu n'en fuguèron coumpletamen tremuda A la subito, tres se muderon en aucèu de predo que davaleron un à cha un subre la terro.

Lou proumié boufavo tout l'èr qu'avié dins lou pitre. Es d'aqueu biais qu'es nascu lou Mistrau, aquèu vènt terrible que sagato tout mounte passo, qu'es un destrùssi de proumiero meno pèr derraba l'erbo folo, lis óulivié meigrelin e tambèn li téulisso di bastido.

Lou secound escupis sa coulèro pèr uno dardaiado de feu. Es coume acò que soun nascu lou foudre emai lis uiau.

Lou tresen revoulunavo sènsoun cala en fasent que de boulega sis alo espetaclooso. Es d'aqueu biais qu'es nascu l'aurasso.

Siblant, trounant, descadenant, li chavano, li brefounié, li trou, lis uiau boutiguèron lis aigo de Duranço e Verdoun. Emé si lagremo de rabi, si boufado rabènto e enferounado, li faguèron veni boudenflo. Meme que n'en devireron li draio, pèr leissa plaço is oundado, pas mai que de plajo de coudoulet round e blanc, dóu tèms que dins li lono dessecado, li moulusque venguèron foussile.

Pièi, faguèron la retirado, empasèron si senglout, pipèron l'èr dins si lèu, carrejant em'éli di mouloun de touno de massacan emé de milion d'amounito qu'escalèron dins lou cèu e faguèron d'aqueu biais un niéu lourdás.

Pau à cha pau, aqueste nivo venguè tant gros, clafi de lourdige, que pousquè pas mai resta en chancello entre lou sòu e l'azur.

Dins un crussimen gigantesc, s'espessavon coume un iòu desmesura mounte lou cruvèu



s'asclavo avans que de s'esclata. Souto lis iue di gigant esglaria, largavon uno pluio de massacan dins soun rode. Lis ourgueiòusi creaturo fuguèron tout d'uno sepóturado souto un clapassié sènsa fin.

D'aqueste tèms plus degun a jamai entendu charra di drole dóu Caïn. D'éli, poudèn vèire vuei, souto lou soulèu de Prouvènço, lou rode mounte se trobo un immènse e roumpatiéu ensevelimen.

Es dins aquèu Paradis prouteciouna que s'escoundon li foussile e particulieramen l'amounito e tambèn la pouliido e mistoulin, estello negro que li dien l'Estello d'Amour. Fau faire mèfi pèr li rabaia, e sobre-tout pas li derraba. De cop que i'a en boustigant li gigant, poudrien bèn recaupre un clapatas sobre la tèsto.

Qu lou saup ?

Roso Pous
D'après uno nouvello gavoto
Mai de 2008

- - - -

Veici uno bono blago que m'a racounta moun dentisto aqueste matin.

Es l'istorì d'une pèço de vint centimo d'eurò e d'un bihet de 500 euro qu'arribon ensèmble au Paradis. Soun aculi pèr Sant-Pèire que decido tant-lèu de faire uno grando fèsto en l'ounour de la pèço de vint centimo.

Pendènt douz jour, es uno fèsto coume degun l'a jamai visto. Tout lou mounde danson e lou champagne raio à long trachèu.

Après douz jour de fèsto lou bihet de 500 éurò s'en va veire Sant-Pèire pèr saupre ço que se passo e demanda de comte.

- Coume, di lou bihet, fasès uno fèsto coume es pas pouossible pèr uno pèço de vint centimo e rèn du tout pèr ieu, un bihet de trio!

Tout d'un vanc, Sant-Pèire li respound:

- Es benfa pèr tu! car t'avèn pas forço vist dins la garbello à la fin dis óufice!

Jaque Tricon



La pichoto culoto de Natalò

Natalò, dòu tèms di vacanço, s'óucupo toujour de si pichot cousin. Soun un pau boulegareù, un pau galejaire, mai bèn brave.

Pèr dejuna, tóuti manjon de bon apetit de bèlli lesco burrado emé de counfituro de la grand. Mai aqueste matin, lou pot de counfituro d'ambricot es vueje.

Natalò escalo l'escabèu pèr prendre un nouvèu boucau sus la darriero estagiero de l'armàri.

Chois, lou pichot darrié de vuech an, se clino souto Natalio pèr regarda souto la pichoto raubo bluio...

Natalò, pas tuclò, l'a vist e se demando perqué Chois regardo aquesto pichoto culoto blanco que n'i'a tout un mouloun, li memo, que secon sus l'estandage dins lou jardin....



T. D.

- - -

Lou passage à-n-Aigo-Morto de Jòrgi Simenon

Un fube d'escrivan s'arresteron à-n-Aigo-Morto o ié restèron quauque tèms e n'en parlèron dins sis obro: Aleissandre Dumas, Reinié Chateaubriand, Maurise Barrès, Antòni Bigot, Jan Reboul, André Chamson, emai uno moulounado d'istourian.

Jòrgi Simenon, lou genious paire dòu coumessàri Maigret, lou grand roumansie, éu tambèn venguè encò nostre, ié situè meme uno de sis entrigo pouliciero.

En 1929 lou jouine escrivan que manjo dins si 26 an, fai basti un batèu e s'en vai regueja ribiero e canau. Viéu dins aquesto barco finqu'en 1931 endé sa femo, sa servicialo, soun chin e tout ço que i'es necite sènsò óublida sa machino pèr escriéure.

Es ansin que venguè dins nostro encontrado. Restè uno passo dins lou canau entre Aigo-morto e lou Grau. Soun batèu estènt amarra à la autour dòu Mol, ié venguè l'idèio de counta uno enquèsto sus un desvalisage dins l'oustau dòu pelot d'aquest tenemen, abitacioun que se capito à quàuqui desenau de metre de la ribo dòu canau. Lou raconte fai partido dòu libre Li 13 enigma. L'endré es bateja pèr l'escrivan Mas de Costo-figo.

Lou proupretàri s'estènt absenta, li raubaire embarron li gardaire dins uno alo de la bastisso e s'entraucon dins l'oustau. L'enquèsto se vai debana i Santo pièi dintre li muraio d'Aigo-Morto. Un raubamen prepara emé siuen pèr uno bando mai que bèn ourganisado de bòumian que se servon d'iscripcióun sus li pèiro di fourtificacioun de nosto vilo.

Veici en quàuqui mot lou resumit de la vido e de l'obro de Simenon.

Nascu en Belgico en 1903, sa vido fuguè tourmentalo e mouriguè en Souïss en 1989. Aprendis pastissié pièi coumés de librarié à 15 an, coumençò de faire de journalisme à 16 an.

À 20 an se marido em' uno artisto pintre (Regino Renchon). Marc Simenon, soun fiéu, sara l'ome de Milèno Demongeot. Aura 3 àutris enfant. Sa fiho Marie-jo se dounara lou cop de la mort dins la flour de soun age.

I'agradavo de frequenta li pàuri gènt dins li bagatòuni e lis endré de marrit renoum di vilo e di port. Un ome forçò apassiouna qu'adouravo li femo, la mar, l'alcol e... lis entrigo pouliciero.

Andriéu Gide fuguè un de si noumbrous amiraire, avié de liame de soulido amistanço emé Jan Gabin, fuguè l'amant de Jóusefino Baker, faguè forçò viage dins lou mounde entié, visquè en Americo, a treva la Get 7...

Soun obro es grandarasso: tirage de si libre 500 milioun d'eisemplàri – 9000 persounage – de milié d'article de prèsso – mai de 1000 repourtage dins si viage à l'entour dóu mounde – revira dins 55 lengo - à la 18° plaço dis autour tóuti naciounalita, à la 5° dis autour de lengo franceso - l'autour bèuge lou mai revira dins lou mounde - 50 filme ispira de soun obro.

Au cinema Maigret fuguè jouga entre autre pèr Pèire Renoir, Michèu Simon, Jan Gabin, Gino Cervi.

À la televisioun Jan Richard e Brunoun Cremer an interpreta soun role.



Louïs d'Andecy

- - -

Istòri de moun ami lou cabussaire

Es uno istòri vertadiero, pleno de desplesi, que coumencè mau e s'acabè urousamen bèn. Aquesto istòri arribè à-n-un de mis ami, grand barrulaire dins lou mounde e apassiouna de cabussado. Counèis tóuti li mar e lis oucean de la planeto. Un jour decidè de passa uno mesado de vacanço dins un clube de vacanço, forçò couneigu, dins l'isclo de Sant-Domingo pèr cabussa e foutougrafia li pèis.

Un matin à la debuto di vacanço, en sourtènt de sa chambro sènt pau à cha pau que soun esperit s'esvali e s'ennèblo, soun bras dre boulego dificilamen e s'encroco.

Pèr precaucioun, decido d'ana vèire lou mège dóu clube. Mai coume l'infiermarié es pas encaro duberto, vai s'entaula au café e espèro un moumenet.

Quouro lou garçoun ié demando ço que vòu béure, éu, rèsto nè, sachènt plus ço qu'es

vengu faire aqui.

Fai que bardouia de mot descourdura. Coumprenènt qu'acò es pas nourmau, lou garçoun, mando quaucun pèr cerca lou mège.

Davans li sintomo, lou mège, decido de lou manda lèu lèu à l'espitau lou mai proche (80 Km). Es bessai un_aucidènt cerebrau.

Pèr cop d'astre astre, l'espitau en questioun vèn d'estre douta d'un escanisaire tout nòu.

(Vous rapelle que sian à Sant-Domingo, dins l'isclo gaire drudo de la mar di Caraïbo e noun à Paris à la Salpêtrière...)

Malourousamen, es mai que nòu! perdequé a pas encaro founciouna, li teinician dèvon reveni dins uno deseno de jour pèr lou metre en service.

Brande-abas de coumbat dins l'espitau, e veici tóuti li mège, emé la noutiço de founciounamen, assajant de metre en service aquest apareì. Fin finalo an pouscu de lou faire marcha e moun ami passè soun escanisaire.

Lou pressentimen èro bon, l'eisamen counfiermè l'aucidènt cerebrau.

Moun ami fuguè, adounc, pres en cargo e sougna couchousamen.

Sènsò l'escanisaire aurié pouscu resta endeca e deveni un vertadié liéume, vo faire l'artimo.

Mai, vesèn pas encaro lou bout de l'ouvede. Après uno semano, l'espitau demando à moun ami de parti, lou tratamen es acaba. Un tàssi lou meno au clube de vacanço e lou leisso davans l'intrado.



Fau saupre

que lou clube sus l'isclo de Sant-Domingo es garda pèr de vigile e que fau moustra pato blanco pèr intra, degun pòu intra sènsò soun brassalet d'identificacioun.

Pecaire, moun ami qu'avié toujour l'esperit ennebla e pancaro coumpletamen revengu, avié ges de brassalet, perdu à l'espitau.

Impoussible d'intra, lou vigile que coumprenié rèn dis esplico enneblado de moun ami, voulié rèn saupre. Urousamen, uno vacanciero que lou couneissié lou faguè intra.

Lou mal-astre countinuo, sa chambro es ócupado pèr un autre e n'i a plus ges de chambro.

Viro que viraras, fuguè decida de jougne Éuropo Assistanço pèr repatria moun ami qu'en avié soun gounfle e voulié assouludamen rintra à l'ousta. Éuropo Assistanço mandè uno acoumpagnarello despièi la Franço e ié demandè d'espera soun arribado dins uno aubergarié ounte uno chambro sara reservado.

E vaqui moun paure ami istala, tout soulet, dins uno aubergarié de lùssi. A-n-un moumen, sourtiguè de sa chambro, mai dins lou courredou prenguè pòu e vouguè tout-d'uno s'entourna. Mai emé sa tèsto embarrado se remembravo plus lou code de la porto. Fin finalo, uno servicialo ié durbiguè la porto e, éu, s'embarrè tant-lèu.

Destimbourla, restè quatre jour embarra, sèns sourti, enjusqu'à l'arribado de l'acoumpagnarello que lou retroubè brutelous sus soun lié e encaro dins li nivo. Lava e carga de vèsti nòu, fuguè enmena au siéu, en avioun. Aro après quauquis eisamen de countourrole, vai bèn e sa memòri es revengudo.

Bèn gaiard aro, longo mai moun ami !!!

Soun mau-countentamen pèr lou biais dòu clube, es uno autre istòri.

Glaude Chave

- - -

A prepaus de l'Infèr?

Vaqui uno questioun de chimò que fuguè pausado à un eisamen de l'Universitat: — l'Infèr es-ti eisoutermi (que largo de calour) o endoutermi (qu'assourbis la calour)?

La responso d'un estudiant fuguè tant fadado que lou proufessour n'en parlè sus Internet.

- Proumieramen, avèn besoun de counèisse coume vario la masso de l'Infèr emé lou tèms. Avèn besoun de saupre quant d'amo intron e sorton de l'Infèr.

Pènse que poudèn dire, sèns doute qu'un cop intrado en Infèr, lis amo n'en sorton plus. Parié pèr lou calcul dòu noumbre d'intrado dis amo en Infèr, devèn regarda lou founiciounamen di diferènti religioun qu'eisiston dins pèr lou mounde d'aro.

La maje part d'aquéli religioun afiermon que se sias pas mèmbre de sa religioun, anarés en Infèr. Coume i'a mai d'uno religioun que seguis aquesto règlo, e coume li gènt creson pas à mai d'uno religioun, poudèn prevèire que tóuti lis amo van en Infèr...

Aro, regarden la vitesso de cambiamen de voulume de l'Infèr, que la Lèi scientifico de Boyle dis que pèr que la pressioun e la temperaturo restèsson identico en Infèr, lou voulume de l'Infèr se dèu dilata proupourciounalamen à l'intrado dis amo, adounc avèn dos poussibilita:

- 1) se l'Infèr se dilato à-n-uno vitesso mens rapido que l'intrado dis amo en Infèr, alor la temperaturo e la pressioun en Infèr aumentaran indefinimen jusqu'à çò que l'Infèr petèsse.
- 2) se l'Infèr se dilato à uno vitesso superiouro à la vitesso d'intrado dis amo en Infèr, alor la temperaturo s'apichounira jusqu'à çò que l'Infèr jalèsse.

Coume faire la chausido?

S'acutan lou poustulat de ma cambarado de classo Jessica , que dóu tèms de ma proumiero annado d'estudiant, me diguè :

— *Fara fre en Infèr avans que couchèsse emé tu...*

E estènt qu'ai coucha emé elo la niue passado, alor l'ipoutèsi dèu èstre veraio. Ansin, n'en siéu segur, que l'Infèr es eisoutermic e a adeja jala...



D'un autre las d'aquelo teourò, es que coume l'Infèr a adeja jala, es que pòu plus reçaupre ges d'amo e adounc eisisto plus! leissant coume acò lou Paradis soulet, e prouvant l'eisistènci d'un Estre divin ço qu'esplico perqué, la niue passado, Jessica s'arrestavo pas de crida:

— *Oh.... moun Diéu !....*

NB. Aquest estudiant es lou soulet aguènt reçaupu la noto de 20/20.

T. D.

- - -

Umour de medecin

Es lou dóutour que parlo:

- *Moun brave, es moun devé de vous dire la verita, aro n'en sian segur, avès uno d'aquéli dos malautié, belèu Alzheimer, belèu Parkinson. Lis eisamen qu'anen faire nous faran lume sus lou sujet. Vous faguès pas de marrit sang, sougna tre la debuto es pas tant grèu qu'acò.*

La semano d'après :

- *La resulto dis analiso es claro, es pas Alzheimer, es Parkinson, dis lou mège.*

Vesènt que lou brave ome es tout desvaria, lou medecin ié vèn ansin pèr de dire de lou rasssegura :

- *Fin finalo es uno bono nouvello, aquelo malautié es forçò mens enfetanto que l'autro.*

...?Prouvènço!... - Buletin n° 65

- *E perqué ? dóutour ?*
- *Vous baie un eisèmple, anas lèu coumprene: lou malaut touca pèr Parkinson, quouro es l'ouro de l'aperitiéu, lou pu meichant que ié posque arriba es que lou tremoulun ié fague toumba pèr sòu la mita de soun vèire de pastaga. Mentre que lou qu'a la malautié d'Alzheimer, éu n'en béu pas pus.*
- *Perqué? Li bevèndo alcoulisado ié soun defendudo à-n-aquéli malaut ?*
- *Noun, mai coume la memòri ié defauto, óublido de-longo de prene l'aperitiéu.*



L. d'A

Lou 29 d'avoust, fuguerian presènt (gramaci à Glaude d'agué participa...) pèr la journado "Porto duberto" au Cèntre de la Revivènço, pèr faire un pau de publicita dóu couss de prouvença. Ero la fèsto de fin d'estieu dóu Cèntre, emé l'espetaclu di pichot. Darrié jour de vacanço, avans la rintrado pèr lou dlun venènt...



...?Prouvènço!... - Buletin n° 65



...?Prouvènço!... - Buletin n° 65